

賊

情

彙

纂

賊情彙纂卷五

偽軍制下

水營

賊初無舟楫故無水營自益陽至武漢擄民船三千餘隻船戶唐正財搭浮橋於漢江楊逆嘉其能始立水營以唐正財為指揮總統水營船務逮至江南擄船愈多幾於浮江萬艘乃升唐

正財為殿前丞相卽以被擄船戶水手為水兵  
分為前後左右中五軍旋增至九軍每軍以軍  
帥領之其下所屬師帥至兩司馬亦如旱營之  
制惟師帥多至六百人虛標分數其實僅得十  
之三四然從賊黠者多樂就水營以其便於剽  
掠不易稽察故也別立水營總制將軍監軍統  
此九軍均歸唐正財調遣張子朋激變水營各

船皆欲揚帆星散楊逆撫慰正財正財調停寢  
息已詳楊逆事實內賊初虜得船隻不知顧惜  
不事修艤計不久皆為朽板自得正財後搜括  
釘鐵油蔴竹木錨纜督工修補煥然一新虜得  
我兵戰船礮船初亦倣式增置羣賊不習駕駛  
不能點礮遂索然廢棄故賊中不分礮船戰船  
坐船輜重船所有船隻皆載賊軍皆載糧糗皆

載器械礮火凡有船皆戰船凡接仗皆出隊其  
江甯水營則全恃木筏木城為營壘船隻大小  
不一未經訓練其實不能接仗賊知之故專以  
人眾船多勝我其由武漢下江南也帆幔蔽江  
銜尾數十里癸丑五月犯江西九月犯武漢甲  
寅正月再犯武漢賊船之多亦不下萬餘艘行  
則帆如疊雪住則檣若叢蘆礮聲遙震沿江州

邑無兵無船莫不望風披靡鄂省亦僅有礮船  
數十隻快划百隻其勢之強弱懸殊百姓逆料  
不敵所以遷避一空而不知賊船皆不能鬪仗  
不過載賊登岸及以聲勢驚人而已當甲寅正  
月賊船甫至武昌城下開礮擊沉數隻賊船遂  
緊貼北岸行走盡關入小河我兵屢駕礮船往  
攻對岸賊但於牆內密排槍礮拒我不能登岸

其闕入之船數千無非往來轉運從未敢出小  
河口接仗逮後陷武昌亦由旱路直撲東門致  
兵勇潰散並非得力於戰船也湖北候補知縣  
羅鳳池極知賊船不能戰鬥常奮然曰使沿江  
牧令皆有膽識不為虛聲所驚安排火船火筏  
處處燒之船上之賊無噍類矣惜皆昏庸柔懦  
之輩但驚賊船之多而不察賊船之無用也若

如所云賊船果無所用乎抑又不然賊仗船多  
驚我所向無前乘風急駛飄忽靡常一日行數  
百里處處使我卒不及防所欲城池不戰卽得  
徧地金帛糧米恣意虜掠任其載運聲勢炫赫  
我兵單薄每不敢遽近及其竄也我無船隻不  
能追剿是比年賊之蹂躪沿江幾無禦之之法  
皆船多為害也故知辦賊者必以焚賊船為第



一要着其間豈無人謀要皆不中窺要惟

欽差侍郎曾公與湖南提督塔公旱隊舟師三路下剿初焚賊船於湘潭約二千艘再焚於岳州約數百艘再焚於城陵磯約數百艘再焚於漢陽小河約四千艘再焚於田家鎮約三千艘其焚賊船之多尤莫過漢陽田家鎮兩次浮屍蔽江江水為沸誠不誣也以上統計賊船被燬

已不下萬艘殲賊何止數萬沈失貨糧又安可  
數計賊之喪膽以此脅從星散亦以此至所殲  
之賊所失輜重賊仍可復得所燬之船賊斷不  
能復得蓋近來民船懼為賊虜賊蹤相距尚數  
百里皆相率遠逃賊虜船日稀萬不能復如往  
日更聞江甯官軍用紅單船燬賊水營船隻殆  
盡果爾則賊船無幾宜其死踞武漢不敢溯江

而上今滅賊之機首以賊無船為可慶是舟師  
下剿克復各城池雖得而復失然使不能復振  
漸可制其死命者於戲焚賊船之功可謂偉矣

**註**


程奉璜所說與謝才  
劉玉貴曾有年諸說同

旗幟器械

匪黨皆山僻亂民揭竿為逆無非裂布為旗削竹為矛初未標新立異嗣因勢日蔓延不獨閭閻百貨皆飽谿壑卽官軍戰守之具亦多資賊逮陷武昌後所執刀矛多用硃漆畫桿雖不必適用然而軍器日求華美可概見矣賊專務虛聲驚人每一軍大小黃旗至六百五十六面之


多計兩司馬旗五百面卒長旗一百二十五面  
旅帥旗二十五面師帥旗五面軍帥旗一面共  
成此數更有總制將軍監軍各典官之旗尤不  
可數計故官軍與賊接仗恒覺賊旗之多也茲  
將賊中旗幟尺寸顏色號衣號帽腰牌各舉其  
一繪圖繫說其槍礮名目賊中多改隱語亦詳  
記之庶考賊情者一覽無遺焉

偽太平軍目內旗圖




此賊初起兩司馬黃旗也長濶二尺五寸其刊  
於偽太平軍目中有太平廣西平南桂平貴縣  
道州上上黃旗等字樣蓋其始虜得一州一邑  
人民皆籍為一軍以旗標別各繫地名嗣所擾  
之處漸多五方雜處湊集成軍難於區分此制  
故廢此旗乃賊旗濫觴特列於眾旗之前云

偽正職官旗圖



偽兩司馬  
黃旗無邊  
長濶二尺五寸






偽卒長黃旗  
無邊長濶三尺



太平天国前壹軍前  
營前旅帥唐

偽旅帥黃  
旗無邊長  
濶三尺五寸




太平天国前壹軍  
前營師帥盧


偽師帥黃旗  
無邊長濶四尺




偽軍帥黃  
旗無邊長  
濶四尺五寸



偽監軍黃旗  
無邊長濶五尺



偽總制黃旗無  
邊長濶五尺五寸



太平天国金壹正  
將軍劉

偽將軍黃旗  
無邊長潤六尺



偽指揮黃綢旗  
黑字水紅邊長  
濶六尺五寸






偽檢點黃綢  
旗紅字水紅  
邊長濶七尺



偽丞相黃綢  
 旗紅字水紅  
 邊長濶七尺  
 五寸




偽侯黃綢旗  
紅字水紅邊  
長濶七尺八寸



偽國宗黃綢旗紅字其  
邊色視何偽王國宗  
卽從何色長濶八尺



偽燕王黃綢  
旗紅字水紅  
邊長濶八尺




偽豫王黃綢旗紅  
字水紅邊長濶八尺



太平天国左軍主將翼王石

偽翼王黃綢  
旗紅字藍邊  
長濶八尺五寸



偽北王黃綱旗紅  
字黑邊長濶九尺






太平天国前導副軍師南王馮

偽南王黃綢旗紅  
字紅邊長濶九尺



偽西王黃綢  
旗紅字白邊  
長濶九尺五寸




太平天国左輔正軍師東王楊

偽東王黃綢  
旗紅字綠邊  
長濶九尺五寸


偽太平軍目一冊首載旗之尖方式樣長濶尺  
寸但不及邊色其時尚未封偽燕王豫王及各  
偽侯其偽東王旗長濶止九尺並定日干侍衛  
旗七尺節氣侍衛旗六尺五寸諸制嗣踞江甯  
以侍衛歸入同職官裁其旗制增封侯王遞加  
至偽東王旗九尺五寸而已其字分紅黑邊分  
各色曾有人親見及俘獲偽旗互相較驗而得

定為圖說適符賊中今制云

偽同職官旗圖



職同檢點旗色  
長濶均同檢點旗




職同監軍旗色  
長濶均同監軍旗

偽雜職皆定為職同何官統謂之同職官名目  
繁瑣難更僕數已畧具於偽官表內茲但圖偽  
天朝總聖庫軍中典油鹽二旗以例其餘偽女  
官亦有旗幟如偽女左輔正軍師旗卽同偽東  
王旗式偽女軍帥旗卽同男軍帥旗之類




專斬臨陣退縮旗




專斬臨陣退縮旗黃綢心綠綢火燄邊長潤一  
尺二寸上平寫東王有令四字下寫專斬臨陣  
退縮六字蓋用偽東王印此旗皆由楊逆頒給  
各佐將臨陣親執督戰者

勝旗圖



易情集卷之三  
賊軍中另有勝旗乃各軍總制自製請偽王用  
印臨陣以此督戰長濶並無定制各軍皆有若  
臨陣退縮旗亦殊不輕頒也

號帽圖



號帽以竹片編為柳條涼帽式上畫紅綠雜花  
雲彩四面留粉白圈四個分寫太平天国四字  
賊恒講道理勸人時時要頂天報國所以將此  
四字寫於帽上也

軍中號衣圖



各衙號衣圖







賊中號衣皆半臂式如俗尚背心之製偽天王  
統下則全黃背心無邊偽東王統下黃背心綠  
邊偽西王統下黃背心白邊偽南王統下黃背  
心紅邊偽北王統下黃背心黑邊偽翼王統下  
黃背心藍邊偽燕王豫王統下黃背心水紅邊  
偽侯至偽指揮統下亦黃背心水紅邊偽將軍  
至偽監軍統下紅背心黃邊偽軍帥至偽兩司

馬統下皆紅背心綠邊前後各綴長五寸濶五寸黃布一方或寫或刷印其初則前寫太平二字後寫第幾軍聖兵數字或某衙聽使數字如前二軍聖兵典金靴衙聽使之類既陷江甯則精其製宋字鏤板濃墨刷印於號衣前後不復另綴黃布矣胸背兩方字樣一律如以上所畫之式

# 軍中腰牌圖



# 各衙腰牌圖



賊每陷一城虜諸色目人脅令拜降謂之拜上帝簡言之曰拜上百姓冀緩須臾之死莫不爭領包巾號衣腰牌一時所備不給甚有削門板為腰牌者其長濶厚薄無一定式樣可知初祇近上平寫太平天国四字其下寫某一軍聖兵某人某衙聽使某人而已既陷江甯亦定其式長濶二寸五分厚三分下綴火印豫製千萬塊

分給各軍各衙備用所寫字樣如以上所畫式  
軍中各典官皆職同監軍所屬人數多寡不一  
有百人則置一卒長分轄四兩司馬二百人則  
置兩卒長無軍帥旅帥諸偽官故各衙聽使腰  
牌無前營後營字樣若係偽朝內偽王府典官  
並無某軍字樣則標典天輿衙典東鑼衙諸名  
色

賊中軍火器械隱語別名

大礮改稱洋裝

抬礮改稱長龍

鳥槍改稱營槍又名小礮

火藥改稱紅粉

槍礮子改稱鉛碼

刀改稱雲中雪

短刀改稱順子

矛杆改稱挑子

兵稱聖兵

鼓稱聖鼓

海螺稱聖角

旗稱聖旗

竹帽稱聖帽



號衣稱招衣

連茨棍改稱神鞭

火彈改稱先鋒包又名紅粉包

噴筒改稱花筒

庫稱聖庫

糧稱聖糧

逆賊皆兩粵劇盜黨與其窩屯嘯聚畏官

司緝捕不敢公然用槍礮火藥如洋裝云  
云者皆盜中之隱語也逆賊沿其習羣下  
口熟現已不能改易如聖鼓聖角之類因  
天主教書中有聖水聖油諸說賊復矜張  
之於百事百物動加一聖字以刼盜之虞  
詞雜邪書之誕語實足亂人耳目此獨軍  
器一端耳其餘竄易偏旁字畫改換名色

尤多不可詰究宜乎軍中俘得偽文書讀  
至終篇反復詳審仍不知所作何語及所  
製所需為何物也

**註**

棋式皆考自偽軍日文告其餘一切情形諱思善姚敦三所記及難民口說與  
程奉璜所說皆同各種賊棋我軍俘獲甚多亦人所共見

營規

官軍俘獲賊中刊本營規一冊僅載營規二十條又獲楊逆誥諭內列禁令多則偽燕王偽示榜列應斬罪多至數十款徧貼賊館賊營似皆偽律非專用以行軍者訪之難民僉謂刊本營規是粵西舊例賊全恃威剗苛刻之今日多實不止前數今姑錄刊本偽營規於左其餘偽示

賊情彙纂

卷五

條禁別入偽文告門內亦可互證而參考也

賊定營規式

一要恪遵 天令

二要熟識天條讚美朝晚禮拜感謝規矩及所

頒行詔諭

三要練好心腸不得吹烟飲酒公正和儺毋得  
包弊徇情順下逆上

四要同心合力各遵有司約束不得隱藏兵數

及匿金銀器飾

五要別男營女營不得授受相親

六要諳熟日夜點兵鳴鑼吹角插鼓號令

七要無幹不得過營越軍荒誤公事

八要學習為官稱呼問答禮制

九要各整軍裝鎗礮以備急用

十要不許謊言 國法 王章訛傳軍機將令

賊行營規式

一令各内外將兵凡自十五歲以外各要佩帶  
軍裝糧食及碗鍋油鹽不得有鎗無桿

二令内外强健將兵不得僭分干名坐轎騎馬  
及亂拿外小

三令内外官兵各迴避道傍呼 萬歲 萬福  
千歲不得雜入 御輿官妃馬轎中間



四令號角喧傳急趕前禁地聽令殺妖不得躲  
避偷安

五令軍兵男婦不得入鄉造飯取食毀壞民房  
虜掠財物及搜操藥材鋪戶並州府縣司衙  
門

六令不許亂捉賣茶水賣粥飯外小為挑夫及  
瞞昧吞騙軍中兄弟行李

七令不許在途中鋪戶堆燒眠睡耽阻行程務  
要前後聯絡不得脫徒

八令不得焚燬民房及出恭在路井民房

九令不得枉殺老弱無力挑夫

十令各遵主將有司號令分發毋得任性自便  
推前越後



照偽書  
全錄

附號令

賊軍中號令惟擊鼓敲金吹螺搖旗而已瞭望  
官軍至及將起行將出隊時俱擂鼓吹螺搖旗  
以集眾打仗則擊鼓呐喊收隊敗退則鳴鉦每  
一擊必一連四聲其暮宿城鄉市鎮打館既定  
必敲鑼傳令徧曉各館其據守一城一鎮也一  
日之內鳴鉦於市者日動十數次賊中謂之喊

令其所傳之令不可枚舉如敲鑼者大呼曰東  
王有令朝內軍中大小官員各衙兄弟人等明  
日黎明齊集某處聽點或呼國宗大人有令丞  
相大人有令大小官員各衙兄弟齊集於某處  
聽講道理之類他如挑濠築塙一切雜役皆以  
喊令傳人俟齊集而後分遣之其犯營規或犯  
天條者重則斬首以二賊扛抬首級一賊敲鑼

大呼於市曰某人犯某事斬首示眾輕者責打枷示亦必荷校游行於市一賊在前敲鑼一賊以竹篦鞭撲之使其自呼因犯何事而得此罪眾兄弟切莫學我云云此賊喊令之熟技其意謂鳴鉦呼令較之傳契箭馳文檄尤為捷速頃刻可以周知日殺數人日枷數人亦鳴鉦徧曉各館者無非以威劫眾時時提警之意也其營

規所列各條卽賊中號令茲不復叙報更不用  
鈺柝每館必設一鼓羣賊輪流支更一更則擊  
一聲五更則連擊五聲定更天明皆無信礮其  
泊船也每船擊鼓支更亦如賊館之例賊船賊  
館虜得鈺鑼及一切樂器任意敲擊並無節奏  
無關號令惟賊敬天父鳴鑼有一定之制應別  
詳賊教門內賊中亦無口號然多隱語其奸細

衣領必藏暗號亦別詳偽文書門內賊之號令  
不過如以上所叙而已惟每晚聽令之制甚屬  
詭秘如兩司馬必至卒長館卒長必至旅帥衙  
遞而上之如偽國宗之踞一城所轄總制監軍  
軍帥每晚必齊集其偽署無敢曠誤卒長兩司  
馬皆有正副正者聽令副者守館謂之照館軍  
帥等偽官無副員則自設協理本員聽令留協

理照館每晚所聽之令外人固不得聞大抵不  
便鳴鉦徧曉之言必於此時密授之如事出倉  
卒則隨時鳴鉦傳集則又不待日夕之趨詣矣

**註**

甘肅李年茂程文偉趙時澤  
所說譚恩普所載皆同



## 詭計

偽軍制既詳記其陣法營壘營規號令卽應載其攻戰守備諸法然而賊無定法其懈我誘我圖我誤我無非詭計兵法戰策草野罕有賊之詭計果何所依據蓋由二三黠賊採裨官野史中軍情倣而行之往往有效遂寶為不傳之秘訣其取裁三國演義水滸傳為尤多我軍堂堂

正正豈屑為此今滙眾說將賊中詭計一一著之於篇俾我軍民習知熟聞自不致復蹈陷穽矣

賊妄肆邪言誠無知狂寇固由賊皆鄙夫不知文義一切文告輒令人齒冷然自初至今不更其說者未始非有意以此惑我也我軍中多儒將習知史事賊如此行為以為斷無不速滅之

理凡獲賊中偽文書見其詞義悖謬有如夢譫  
則羣起而唾詈之訕笑而易視之往往輕賊無  
備以致敗挫大抵賊肆邪言專主惑人至於用  
兵別有詭道猶之深險人將欲謀人而佯示猥  
瑣使人不疑不防耳或謂此深求賊情之過論  
未必其然此說亦是究願辨賊者於賊之披猖  
險詐不易得手諸處用心着力似不必嗤其闇

陋致懈我心而為其所乘不更善乎

賊行邪教既懈我將領之心又能奪我兵勇之  
氣並能使被脅愚民崇信之而不敢背叛兵勇  
安知前古成敗之迹原無輕賊之心賊之惑我  
兵勇則在異言異服讀讚誦咒多張旗幟盛陳  
儀衛衣巾則紅黃一片吶喊則呼聲如雷使我  
軍耳目迷眩遂疑賊教果有邪術曾聞堵城逃

勇云賊匪有能騰空者實親見之故一隊驚潰  
嗣獲老賊鞠問始知賊眾打仗時在後之賊乘  
槍礮煙迷之際各脫紅黃短衣向空拋擲兵勇  
遙見誤認賊匪能飛往往駭潰今習戰兵勇雖  
漸知賊無甚伎倆然訝其裝束奇異若鬼神然  
終覺邪術之可憚先餒於中設一軍將領輕賊  
無備兵勇憚賊退縮安求制勝之道哉至於被

脅愚民始雖訝其非道既而朝夕禮拜諷誦之  
耳濡目染莫不迷惑忘死從來叛逆多籍邪教  
倡亂而粵匪為尤甚也

賊之奸黠首在能審勢度力如攻桂林不下則  
陷全州攻長沙屢敗則下竄湖北攻南昌不下  
則攻田家鎮攻田家鎮知力不敵則先虜興國  
大治力足然後破之勢不足陷武昌則徧擾四

圍郡邑絕我援餉俟我饑疲彼勢強盛然後陷  
之上溯襄河直逼棗陽知襄陽堅守而有敢戰  
兵勇遂幡然回竄犯荊州一敗旋即退去踞麻  
城憚羅山縣勇多咫尺不敢往受創於黃安誓  
不復去屢敗於湖南賊以湖南為畏途調往之  
賊有暗泣者若謂賊匪不畏官兵真妄論也夫  
攻堅則力倍而多損攻瑕則力省而效速賊安

知勝算然能逞其巧詐毫無拘執捷若轉圜愈見賊教專主惑人其窺伺圖維似別有所主矣賊安知兵法專尋花樣於小說中如設伏也必於歧險之處豫伏賊兵三路用一軍詐敗以誘我兵引至其處伏兵齊出此伏兵未必皆勁旅每以工匠幼孩充數甚至雇倩鄉民執旗呐喊我兵驟然遇伏氣奪反奔鮮不敗挫



賊中一味講求埋伏有剪尾衝腰諸法賊每出  
隊或豫伏一軍於我兵之後我兵之左右當酣  
鬥時非潛出剪我之尾卽突出衝我之腰我兵  
驚顧亦每致挫大抵賊明路攻擊必選勁卒設  
伏則專以人眾驚我使我兵自計以為千數百  
賊與之苦戰猶不能勝今忽益以無數之賊尚  
可禦乎人心疑怯奔北不遑而不知設伏皆無

用之賊不過用數驍賊督帶耳

我軍出隊離營十數里賊必暗繞一軍斷我回營之路既可夾擊又可直撲我營我營中未見我兵收隊忽然見賊能不驚疑

賊每聲東擊西故縱逃人洩其機密多方誤我賊每製我軍冠服旗幟賺城或突入我營

賊每用鄉官率領百姓迎接官兵賊匪卽雜其

中乘機圖我

賊圍攻我城我營密布營壘特空一面以誘我  
出此其實先有伏兵於路要擊

賊於山川形勢自度地利已為我占忽一夜盡  
退再遲一日探之甚至退二三百里別據一城  
一市為營果爾必是賊得地利之處誘我進剿  
以逸待勞反客為主也

賊凡奉偽令退兵每以進為退必連日出隊打仗不息反進數十里或數里逼近我營下寨使人不疑其退其實布置周密一夕已不知遁往何處

賊於其退也必於城內寨內留瞽目殘疾多人擊鼓吹角城牆土牆或立草人或立木樁上頂竹帽晝則徧插旌旗夜則虛張燈火甚至賊去

數日附近鄉民猶不知也

賊如詐退圖我虛立營寨亦如以上情形誘我軍入其空寨四面伏兵齊出環擊之

賊為我兵追急忽將元寶金銀華美衣物徧擲於地誘我兵爭取賊復整隊回撲之

賊中素選魁梧大漢塗面掛鬚衣以神鬼之服手執箔帖斗大銀鉞或執背寬五寸及長五六

尺之箔帖假刀擁以大黃旗羽葆每於酣鬥時  
數騎突出驚我兵勇

賊黑夜驚我營盤尤為慣技如驚旱營必遣數  
驍賊乘馬各懷火毬數枚密藏火種更以慄賊  
百人隨之攜帶鼓角旗械銜枚急走約距我營  
數里則伏於暗陬俟三更後數騎賊直馳抵我  
土塙跣鞍攀登各撒火毬燒我帳房必有四五

處燃着當閣營驚擾之時數里外百賊遙見火  
起則鼓角齊鳴飛奔我營昏夜不知賊之多少  
往往致潰其驚我水師每用大船數隻載葦柴  
焚着漸漸逼近誘我礮船抵擊別用無燈黑划  
多隻繞至礮船之後及輜重各船左右拋火毬  
放噴筒焚我數船黑夜驚擾不容不退或於岸  
上暗處四十步置一二賊專放噴筒相間排列

至十餘里其實僅二三百賊噴筒亦不能及我  
船但舟師翹望江岸十餘里火筒如流星相繼  
不絕眾心疑懼不約而同必退駛矣

賊目每選慄賊一隊與我兵戰故意退往絕地  
誘我兵追之及至水窮山阻之處忽變為伏地  
陣此時賊眾自知不戰必死連返戈回擊之時  
無不以一當十



賊慣用奸細混入我城我營往往慄賊登城纔  
一二人頃刻黃旗成隊大抵稽查疎懈處賊可  
得志未必處處皆然

賊攻城曾用呂公車被創遂廢此法凡開地道  
多以棺材裝火藥爬城亦多造雲梯遇堅守之  
城必多施詭計更有驍賊手持數竹釘即可援  
城而上凡地道轟缺城垣城上兵勇皆爭赴缺

口堵禦賊見無人之處遂乘間攀登破城之處  
並未進賊未破之處賊已魚貫猱升而上矣如  
武昌江甯實因此而陷非賊皆由缺口進也當  
火藥轟揭城垣時塼石飛揚煙霧障天約一炊  
之頃對視不辨眉目兵勇賊眾皆耳目迷悶相  
拒木立煙霾畧散兵勇先奮則城可保賊先登  
則城陷此又一定之理至守城殲賊最多則莫

過全州之桐油糜淖懷慶之火藥瓦礫南昌之火藥桶賊中至今談及猶切齒股慄

賊曾用火牛衝我營壘以刀繫牛角以麻束牛尾浸油熬之然不常用其攻城之誤我也每夜用牛多隻以燈籠火炬繫牛角上燒其尾使狂奔城下或用小舟數隻上置燈數盞各用一人盪漿往來江面城上兵勇疑賊來攻槍礮徹夜

卷之五

花包拋擲城下積累成梯頃刻可上

賊之操演以老賊領兩隊作對面環抱交叉勢  
瞬息之間老賊俱已在後新虜之眾皆在前每  
打仗輒給新虜之人曰爾等毫無本領何能打  
仗不過用爾輩助威耳我們老兄弟俱在前隊

但我們殺入妖營妖已到你們面前如再不刺殺敢退後者立斬其實上陣之時亦作環抱交換之勢須臾老賊在後新賊居前與我軍短兵相接新賊誤認老賊已入我營且恐退後立斬莫不奮勇爭先然無技藝多被我兵殲斃設勢不可支之時方鳴金牽線以退猶能以勢聚拒我而老賊實無所損也

賊以威脅新擄之眾打仗又以詭計使其在前  
雖無技藝然齊一心志誓以死鬥我軍往往不  
敵卽遇我之勁旅是殺斃皆我之人民與老賊  
初無所損況此一萬數千之新賊又安能一次  
殺盡或有經數十戰猶存者譬之頑鐵百鍊亦  
可成鋼此輩卽無伎倆到此地步亦成能者以  
我民人冒鋒刃當槍礮又能於此中鍊出戰士

心雖喪盡而計為至巧夫粵西老賊不過數千  
今轉戰數年何存者尚夥實處處以我人民替  
死之故可勝歎哉

賊每用廟宇中土木偶以船裝載先搪槍礮候  
我彈稍稀真賊繼至

賊穴地攻城專在城外空房內開挖城上兵勇  
不得見凡守城之處四圍五里不可留房屋其

裝藥無非棺材布袋以油紙包裹然引線必用竹筩套接五里之外似賊亦不易為矣

**註**朱祖培羅鳳池瞿騰龍駱永忠曹鼎門羅芳溶等  
所說戎林吳兆桂所供與程奉璜所說皆大同小異



## 附技藝

逆黨皆所脅鄉民何技之有然賊卽以無技為技以人眾為技以敢死為技以能耐勞苦忍饑渴為技其打仗亦有熟習之技每遇我兵槍礮齊施時皆伏帖於地候彈稍稀雀躍而猱進轉眴已至槍兵之前甚至舉刀矛傷我一二人此時我之火器已屬無用若刀矛兵退縮鮮有不

敗者他如渡不測之淵登壁立之山賊目必以  
威脅不進者殺此時死者自死渡者自渡登者  
自登故我之險不足恃我將帥雖甚嚴斷不肯  
強人以不能賊但取自便不近人情喪心至此  
亦一技也此外則有聲色二技聲則萬人大呼  
殺妖色則衣巾旗幟一片紅黃可以亂我兵耳  
目若施放槍礮命中致遠千百賊中無一能者

臨陣亦用火器每以抬槍枕木架度於地上發  
火後趨避遠立官軍恒訕笑之近所擾之地甚  
廣漸有能放槍礮之賊以一軍計之仍不過萬  
人中數十人其拋火毬放噴筒人人優為之固  
不待習也賊中於此技較精至於火箭則不諳  
造法虜得我軍中火箭亦不知施放其刀矛擊  
刺賊中間有能者然從無教習操演之說其臨

陣也惟蠻砍亂刺而已偶有偽帥樂於演練皆私為保身計非賊令也於刀矛不禁於火器且禁之蓋恐新擄之人乘操火器時反向擊其渠賊一時人眾無可究詰耳故止功勲老賊始准習用火器賊踞之處有時鼓角喧闐非操演耶然操演非技藝惟以大旗數面各領一隊牽線急趨以捷疾不脫落為合式氣喘力疲退後者

答之是賊中所練惟飛奔狂躍而已

**註**

戎林吳兆桂所供與程奉璜  
張玉琴張長義所說皆同

偵探

賊起自粵西其時卽傳聞賊之偵探最確曾用  
白足蠻婦担米入桂林城探信盤獲殺之他如  
官軍少處則賊眾飄忽卽至守備嚴處賊每繞  
越不入其境羣以意揣遂謂賊探至多至得力  
殊不知不然近日城門營盤盤詰愈嚴賊安能  
混入如甲寅正月賊據漢陽漢口圍攻武昌半

年之久餉盡援絕兵勇時欲內潰賊如知之自  
四月以還何日不可來攻一攻卽不可收拾其  
久之不攻者蓋賊仍知武昌餉可支年餘兵勇  
有三十萬故也曾詢賊中逃人云賊據漢陽漢  
口時曾差奸細探武昌虛實發遣數十起其回  
漢陽覆信者不過三五人凡差此等人多屬賊  
中心腹未必肯逃其不歸者皆為我軍盤獲殺

訖可知矣探覆之數人僉謂武昌豐備倉有穀  
米百餘萬石庫銀八十萬兩城外兵勇二萬城  
內兵勇三十萬大礮數百尊賊懾其威故蠶食  
四圍不敢驟攻省會也自五月中旬賊於鸚鵡  
洲虜去川勇數人以刑拷之始畧知省中餉盡  
兵勇不多而尤不知其危若是故始由青山渡  
賊紮營猶為我軍勦退繼由梁子湖渡賊攻撲



東門經營一二十日徐徐來攻不意一戰卽潰  
及得武昌賊目狂喜咸謂不料如此之易賊探  
之不能確切於此可知其不能確切亦非無故  
賊所遣之人多閤陋鄉民安知我文武衙門體  
制及營中紀律斷無混入官署營盤本領自怯  
於中亦不敢逼近官署營盤刺探無非訪詢居  
民鋪戶及江湖星卜諸人此等人亦不知我軍

虛實但居此城中莫不願此城之可守曾聞武昌百姓相約相戒曰但有人問兵數餉數總宜多說恐是奸細可以吹風駭賊人心僉同可見賊探之訛皆出此等人之口所謂百餘萬三十萬八十萬亦民間相約之詞賊探徧詢皆同宜乎探者確信屢探皆同宜乎賊目亦確信也然則賊每探必訛乎抑又不然大抵我城中事賊

不易知若我軍一行屯於原野則賊探幾無不確矣何以知之其探武昌城外祇二萬兵勇頗不懸絕蓋賊探我營則另有伎倆多遣賣食物人近我營盤日與我兵勇相見稔熟閑談便可得實話矣近探我營之術愈精愈確必籌所以防之賊於所得之地徧立鄉官每鄉以數魁盜督領之卽役使鄉官統下偽官伍卒就其所習

之業如賣棉紗布線錢繩茶葉之類予以貲本  
徧撒多人令其上下左右各探四五百里限日  
期回報如所探不實或不盡力則殺其一家而  
焚其廬鄉民怵於滅門之禍無不竭盡心力此  
等本是田間百姓形色衣履毫無瑕隙往來我  
城池營盤諸處習見不察誠足慮也

**註**

廣西情形李秉方靖說武昌情形禹繼賢譚恩普  
說現役使鄉民情形田行達賀啓潘鴻藻等說